

Aen Hozdung “Couqmaenh Gij Eiqsik Caezcaemh Cunghvaz Minzczu • Meizdij Doxduenq Fangzcwngzgangj” Youq Fangzcwngzgangj Haiguh

(Bonjbauq siusik gicej Lij Daucih Loz Denh Vangz Yinz Vangz Yijyinh) 7 nyied 10 hauh, aen yizsiz hozdung “couqmaenh gij eiqsik caezcaemh Cunghvaz Minzczu • meizdij doxduenq Fangzcwngzgangj” caeuq bi 2023 gij bauyez dieg siujsoq minzczu Cungguk cwngcomz doxgyau anqlaeh ndei youq Fangzcwngzgangj Si haiguh. Hozdung guh sam ngoenz, aen donzcaifangj cenhmeizdij bae daengz Fangzcwngz Gih、Gangigouj Gih、Dunghhingh Si daengj dieg, ngonzyawj gamjsouh Fangzcwngzgangj aen “sanhhaijgvanh” henzguk baihnanz gukcoj neix youq couqmaenh gij eiqsik caezcaemh Cunghvaz Minzczu guh ok gijmaz cingzek, gamjsouh gij yienghndei minzczu、daegsaek henzguk、lizsij vwnzva aen singz neix.

►Aen donzcaifangj youq Mbanjczusanh caijfangj.



Aen Vunqsik Diuzgaij “Ngveihlwgloux” Bwzliuz Couqmaenh Gij Eiqsik Caezcaemh Cunghvaz Minzczu

Bineix doxdaeuj, Bwzliuz Si cauhamoq guhhong, Bwzliuz Siveij Dungcanjbu guhdaeuz, caeuq Bwzliuz Si Fazyen、Bingzcwng Cin Dangvej Cwngfuj youq Bingzcwng Cin Mbanjsizliuz guh fungh ranz diuzgaij “ngveihlwgloux”, bang vunzlai gak minzczu gaijgez doengh gij vwndiz gaenj guh、hoj guh、youheiq、maqmuengh haenx. Neix ndaej gaijgez ngaekngeu、coi huzndei, coicaenh gak minzczu lumj ngveihlwgloux nei gotndaet youq giz ndeu.

Aen doihdiuzgaij dwg doengh boux ganbu Bingzcwng Fazdingz、Aen Cunghsinh Cunghci ndawcin、baicuzsoj、swhfazsoj、song vej ndawmbanj、bouxgingqnaek ndawmbanj caeuq Aen Hoih Coicaenh Saehnieb Goeng’ ik daengj. Gyoengq diuzgaijyenz sugrox vunz、dieg、fungsug daengj, miz ngaekngeu gyoengqde diuzgaij gonq, coh daengz fazgvanh saemjbuenq, guh daengz vaqgej ngaekngeu、swhfaz nyinhdingh、diuzgaij hengzguh doiqciep ndaej ndei, hohndei gij gienzik habfap gak minzczu vunzlai.

Laebbaenz fungh ranz diuzgaij neix, daezsang le gij naengzlig ceihleix hongsaeh minzczu, guh caez guh ndei aen daihbuenz aeu lai fuengsik ceihleix hongsaeh minzczu. Neix caemh okrenz coicaenh Bwzliuz Si cauhaeb aen si guhyiengh minzczu doxgiet baenaj daengx guk, doicaenh gih raeuz hwnqguh aen gih guhyiengh couqmaenh gij eiqsik caezcaemh Cunghvaz Minzczu.

(严玉莲/Yenz Yilenz)

Gak Minzczu Beixnuengx Yungzsuij Caez Gvaq “Cietdwkbya”

7 nyied 12 hauh, liggaeuq loeg nyied cocaet, dwg ngoenz “cietdwkbya” laeng Liujcouh Si Yungzsuij Myauzczu Swciyen Anhdei Yangh Mbanjmyauz Beizsiu. Yienhciengz, geij boux vunzmbanj bau duzbya hwnj gwnz mbwn bae, lajneix gak minzczu beixnuengx ciengj dwk ciep bya、gaemh bya, eiqnaeuz “bibi miz lw、gwn daenj mbouj you”. Sing hemqndei、sing baeuhraemx、singriu daengj yaep hung yaep iq, gig nauhyied. Youq aen yienh neix, moix bi liggaeuq loeg nyied co’ ngeih daengz cibroek, gak aen mbanj cungj doxlwnz guh hozdung dwkbya, yienh’ ok vunzlai gyaepgouz ndwenngoenz huzndei、vuenyungz.

(黄诚/Vangz Cwngz 梁俊远/Lieng Cinyenj 黎荣芳/Liz Yungzfangh)



▲ Boux hekyouz ciengj ndaej duz bya ndeu.



▲ Gyoengq lwghag daejniemh cigboq gai huq.

Bingzgvei Gih Guh Aen Hozdung Nyezrauh “Samgyau”

7 nyied 11 hauh, Hocouh Si Bingzgvei Gih haiguh “doeng sae yienfwngz saenqhwnj lajmbanj • cingcin soengqlaex angq coux laeb yangh” aen yizsiz hozdung nyezrauh “samgyau”. 46 boux lwghag laeng Dunghgvannj Cwngzsi Yozyen、Hocouh Yozyen, Bingzgvei Gih doengh aen danhvei mizgven haenx camgya hozdung.

Baezneix aeu coenghrenz Dabingz Yauzczu Yangh laeb yangh 40 hopbi guh cawjdaez, guh buek hozdung den-sangh cigboq、youq gwnzciengz lajmbanj vehveh、diuyenz gij huqdoj ndei cizdij ginghci、daejniemh feihyiz siuqva Yauzczu、vwnzyi biujyienj daengj, coicaenh nyezrauh doxgyau, hawj gyoengqde engq nyinhdoengz gij eiqsik caezcaemh Cunghvaz Minzczu.

Bingzgvei Gih lij caeuq Dunghgvannj Cwngzsi Yozyen ciemdingh aen hezyi nyezrauh doxgyau, gyagiengz doxgap guh hozdung gwnzbiengz saedguh, coicaenh gak minzczu nyezrauh “samgyau”, couqmaenh gij eiqsik caezcaemh Cunghvaz Minzczu.

(黄丽娟/Vangz Ligenh 韦艳/Veiz Yen 李灏/Lij Hau)